

Inatsisissatut siunnersuummut nassuiaatit

Nassuiaatit nalinginnaasut1. Inatsisissatut siunnersuutip tunuliaqutaa

2011-mut aningaasanut inatsimmi isertitassanik peqqumaatinik pilersitsiniarnermut aammalu Naalakkersuisut meeqqanut inuusuttunullu tunngasutigut annertunerusumik iliuuseqarnissamik salliutitsinerannut atatillugu aningaasanik ikisilluni pinnguaatinut akileraarut pillugu Inatsisartut inatsisaat allanngortinneqassasoq siunnersuutigineqarpoq.

Siunnersuut aningaasanut politikikkut aningaasanik ikisilluni pinnguaatitigut sinneqartoorutinit akileraarutit annertunerusut Nunatta Karsianut akilerneqartarnissaannik kissaateqarnermik tunngaveqarpoq. Ullumikkut iluanaarutit ilaat taakkua pinnguaatinik pigisaqartunut iluanaarutaasarput.

2. Inatsisissatut siunnersuutip imarisaa

Siunnersuutigineqarpoq equiffiusartutut pinnguaatinut pissarsissutaasinnaasunut akileraarut 5.000 koruuninik qaffanneqassasoq.

Aningaasanik ikisilluni equiffiusarluni pinnguaammut pissarsissutaasinnaasumut siullermut akileraarut taamaasilluni 64.000 koruuninut allanngortinneqassaaq. Aningaasanik ikisilluni pinnguaammut pissarsissutaasinnaasumut tullermut akileraarut 70.000 koruuninut allanngortinneqassaaq pinnguaatillu sinnerinut tamanut 76.000 koruuninut.

3. Aningaasatigut allaffissornikkullu pisortanut sunniutissai

Aningaasanik ikisilluni pinnguaatinut akileraarummik qaffaanissamik siunnersuut Nunatta Karsianut ukiumi aningaasaliiffiusumi 2011-mi ukiunilu missingersuusiorfiusuni ukiumut 900.000 koruuninik isertitsissutaasarnissaa naatsorsuutigineqarpoq, taamaasillunilu aningaasanik ikisilluni pinnguaatinut akileraarutunik ukiumut isertitat katillugit 12 mio. koruunit missiliussallugit.

Akitsuummik qaffaanerup akileraarutitigut isertitat annertussusiat annikitsumik sunniuteqarfigissagaat naatsorsuutigineqarpoq, tassami pinnguaatinik piginnittup aningaasarsiat akileraaruteqaataasussat naatsorsorneranni pinnguaatinut akileraarut ilanngaatigisinnaammagu.

Siunnersuut allaffissornikkut sunniuteqassanngilaq.

4. Aningaasatigut allaffissornikkullu inuussutissarsiutinik ingerlatsisunut sunniutissai

Akileraarutit qaffannera inuussutissarsiutinik ingerlatsisunut immikkut aningaasartuuteqartissaaq, taamaattorli taakkua aningaasarsiat akileraaruteqaataasussanit ilanngaatigineqarsinnaallutik.

Siunnersuut inuussutissarsiutinik ingerlatsisunut allaffissornikkut sunniuteqassanngatinneqanngilaq.

5. Avatangiisinut pinngortitamullu sunniutissai

Siunnersuutip avatangiisinut pinngortitamullu sunniuteqarnissaa ilimagineqanngilaq.

6. Aningaasatigut allaffissornikkullu innuttaasunut sunniutissai

Siunnersuutip pinnguaatinik atuisartunut sunniuteqarnissaa ilimagineqanngilaq.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersuut naalagaaffeqatigiinnermut attuumassuteqanngilaq.

8. Oqartussaasunit soqutigisaqatigiinnillu tusarniaaneq

Siunnersuut ukununga tusarniaassutigineqarsimavoq:

KANUKOKA, Kalaallit Nunaanni Sulisitsisut Peqatigiiffiat, Nunaqavissut Suliffiutillit Kattuffiat (NUSUKA), Sulinermik Inuussutissarsiuteqartut Kattuffiat (SIK), Inuussutissarsiornermut Suliffeqarnermullu Naalakkersuisoqarfik, Aalisarnermut, Piniarnermut Nunaleriner-mullu Naalakkersuisoqarfik, Ineqarnermut Attaveqarnermullu Naalakkersuisoqarfik, Nuna-mut namminermut, Pinngortitamut Avatangiisinullu Naalakkersuisoqarfik aamma Aatsitas-sarsiornermut Pisortaqarfik.

Tusarniaanermut akissuteqaatit ukunanga tiguneqarsimapput: Kalaallit Nunaanni Sulisitsisut Peqatigiiffiat (GA), KANUKOKA, Kommuneqarfik Sermersooq, Nunamut namminermut, Pinngortitamut Avatangiisinullu Naalakkersuisoqarfik (NNPAN), Aalisarnermut, Piniarnermut Nunaleriner-mullu Naalakkersuisoqarfik (APNN) aammalu Aatsitassarsiornermut Pisortaqarfik. .

GA-p ilisimatitsissutigaa qularnanngitsumik isertitassat siunnersuummut oqaaseqaatini oqaatigineqartunit ikinnerungaatsiarsinnaasut,, ilimagisariaqarmat pinnguaatit arlaqartut unitsinneqarnissaat. GA-p ilimaginngilaa isertitat naatsorsorneqarsimasutut 900.000 koruniunissaaat, immaqali 750.000 koruniullutik pinnguaatit ikileriassappata.

Pinnguaatit illoqarfinni mikinerusumi ikkussuunneqarsimasut atorunnaarnissaannut periarfissaqavippoq, akileraarutit qaffanneqarnerat pinnguaatit pigiinnsarneqarnissaannut iluaqutaanngimmat. Akileraarutit qaffanneratigut aningaasartuutaanerusussat piginnittup akileraarutaasussanik isertitaanit ilanngaatigineqarsinnaanerata eqqarsaatigalugu, annikitsuinnarmik ikileriaateqarnissaq ilimagineqarpoq.

Kommuneqarfik Sermersuup siunnersuutip tusarniaassutigalugu nassiunneqarnerata kingusinnera ajuusaarutigalugu oqaatigaa, allanillu siunnersuummut oqaaseqaateqarsimanani.

Naalakkersuisut politikikkut siunnersuummik suliarinninnerat pissutigalugu ajuusaarnartumik siunnersuutit siusinnerusukkut nassiussuunnissaat ajornarsimavoq.

KANUKOKA siunnersuummut oqaaseqaatissaqarsimanngilaq. Tamannalu aamma NNPAN-imut, APNN-imu aammalu Aatsitassarsiornermut Pisorttaqarfimmut atuuppoq.

Aalajangersakkanut ataasiakkaanut nassuiaatit

§ 1, nr. 1-imut

Siunnersuutigineqarpoq aningaasanik ikisilluni pinnguaammut pissarsissutaasinnaasumut uki-umoortumik akitsuut 5.000 koruuninik qaffanneqassasoq, taamaasilluni aningaasanik ikisilluni pinnguaammut pissarsissutaasinnaasumut siullermut akileraarut 59.000 koruuniniit 64.000 koruuninut qaffalluni, aningaasanik ikisilluni pinnguaammut pissarsissutaasinnaasup tullianut akileraarut 65.000 koruuniniit 70.000 koruuninut qaffalluni aningaasanillu ikisilluni pinnguaatit pissarsissutaasinnaasut pigineqartut sinnerinut tamanut 71.000 koruuniniit 76.000 koruuninut.

§ 2-mut

Siunnersuutigineqarpoq Inatsisartut inatsisaat 30. november 2010-mi atuutilissasoq, imaasiluguli akileraarutit allangortinneqartut siullerpaamik 2011-mi januarimiit qaammatinut pingasunut tunngasumik akitsuutinut sunniuteqartussanngorlugit.